

Ilinniarfinni meeqqallu atuarfiini attaveqatigiinnikkut teknologip ukunatigut atorneqarnerata annertusarneqarnissaanik attaveqaatillu pitsangorsarneqarnissaannik Naalakkersuisut suliniuteqaqqullugit Inatsisartut aalajangiiffisassaattut siunnersuut:

1. Internetsi ilinniarfinni atuarfinnilu tamani killilersugaanngitsumik atorneqarsinnaalersinneqassaaq.
 2. Attaveqaatit pitsaanerpaat (sukkanerpaat) ilinniarfinni tamani pilersinneqassapput.
 3. Ungasianiit ilinniartitsinerup atorneqarnerulernissaa siunertalarugu “ungasianiit ilinniartitsivimmik” pilersitsisoqassaaq. Ungasianiit ilinniartitsiviup pingaarnertut sallutillgulu suliarissavaa nunaqarfinni meeqqat atuarfiini atuartitsissutit ilinniartitsisussaaleqiffiusut naammaginartumik atuartitsissutaalernissaat anguniassallugu.
- (Inatsisartunut ilaasortaq, Kaali Olsen, Inuit Ataqatigiit)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Naalakkersuisut siunnersummut pissanganartumut qujapput.

Siunnersuuteqartup oqaatigisaatut atuarfeqarnermi ilinniarfeqarnermilu ulluinnarni atuartitsinermi internetimik atuinermi periarfissarpassuaqarlunilu iluaquitissarpassuaqarpoq.

Taamatuttaaq ilumoorpoq ATTAT-mmi internetimi kiffartuussissuterpassuit soorlu nipiler-suutit, videot attaveqarfiillu mattunneqarmata. Mattussinerit taakku aningaasaqarnermiinnaq tunngaveqarput – tassa imaappoq aningaasaliissutit aningaasanut inatsimmi immikkoortineqartut internetimillu atuinermut akit akornanni naapertuitinngitsoqarnera, pissutigalugu.

Siunnersuuteqartoq allappoq attaveqaatit aqquaasa imaqqortusinerisigut atuisuniillu amerlanerusunit ataatsikkut atorneqarsinnaanngornerisigut kiisalu ATTAT-mmi matusat ikinnerutinnerisigut IKT-p, tassunga ilanngullugu internetip ulluinnarni atuartitsinermi atortutut paassisassarsiorfittullu ilanngunneqarnissaat periarfissaassasoq. Taamatuttaaq allappoq attaveqaatit aqquaasa imaqqortusinerisigut atuisuniillu amerlanerusunit ataatsikkut atorneqarsinnaanngornerisigut matusallu ikinnerutinnerisigut ungasianit atuartitsinermut atugassarititaasut pitsaanerujussuanngorsinnaasut. Tamatumunnga atatillugu ”Ungasianit ilinniartitsiveqalernisaq” siunnersuutigineqarpoq. Kiisalu ilaqtariippassuit teknologiimik nutaamik atuinissamut suli periarfissaqanngitsut oqaatigineqarpoq tamatumalu ilaqtariit taakku nalinginnaasumik inieriartornermi kinguaattoornerat kingunerisinnaagaa.

Tamakku Naalakkersuisut isumaqatigaat.

Qarasaasiakkut ilinniarneq pillugu ataatsimeersuarnermut Sarfarissumut qanittukkut pisumut atatillugu TELE Greenlandip atuinermik akeqartitsinera pillugu ajornartorsiutit eqqartugaa-sorujussuupput.

Tamatumunnga atatillugu TELE Greenlandimit, Aningaasaqarnermut Sulisoqarnermullu Aqutsisoqarfimmit kiisalu Kultureqarnermut, Ilinniartitaanermut, Ilisimatusarnermut Ilageeqarnermullu Aqutsisoqarfimmit Sarfarissumut aqutsisoqatigiinnit saqqummiunneqarpoq TELE, Namminersorlutik Oqartussat aamma KANUKOKA attaveqaatit aqquaasa imaq-

qortusineqarnissaannut atuisuniillu amerlanerusunit ataatsikkut atorneqarsinnaanngornisaannut kiisalu matusat ikinnerutinneqarnissaannut ilinniartitaanermi pisariaqartinneqartunik malinniffiusinnaasumik akeqartitsilernissamut periarfissanik ataatsimut eqqartuissasut.

Tamatuma saniatigut ataatsimeersuarnermi aamma isumaqatigiissutigineqarpoq attaveqaannarneq naammanngitsoq. IKT atuakkat, pappiaqqat aqerluusallu assigalugit atuartitsinermut pissusissamisoortutut atuartitsinermut suli ilanngunneqanngilaq. Tamatumunnga atatillugu qaffasissutsini tamani atuartitsisunik ilinniartitseqqittarnermut ingerlaqqiffiusumillu ilinniartitsisarnermut tunngatillugu kinguaattooqqasoqarpoq. Tamanna IKT-p ilinniartitaanermi atugaanerulernissaanut pilersaarutissamut ilanngunneqassaaq pilersaarullu taanna sapinngisamik internetikkut periarfissaqarnerulernermut ataqtigissaarneqassalluni.

Assersuutigalugu internetikkut pitsaanerusumik attaveqalernikkut atuartitsisut ungasianit atuartitsinikkut ilinniarteqqinnejarnissaannut ingerlaqqiffiusumillu ilinniartinneqarnissaannut periarfissaqarnerulissaaq, imaaqqunartumik pikkorissartitsinerit nutaaliorfiusumik atuartitsinernik ilinniartunut ingerlaannaq iluaqutaasussanik suliaqarnissamut atorneqarnissaat siuarsarlugu.

Isummat tamakku tamaasa Naalakkersuisut pissanganartippaat. Taamaattumik TELE aamma KANUKOKA suleqatigalugit taakku Naalakkersuisut malersornialersarpaat, ilinniarfinnut interneteqartitsineq pillugu ajornartorsiutip susassaqartunut tamanut aaqqinnejarnissaa anguiarlugu.

Ungasianit ilinniartitsivimmik pilersitsinissamut tunngatillugu Naalakkersuisut isumaqarput taamatut ilusiliisoqassappat taanna Institut for Læringimi pilersinneqartariaqartoq. Taamaaliornikkut ilinniartitsivik ilinniartitsisunut ilikkagassanik, pikkorissartitsinermik ilinniartitsinermillu suliaqarneq pillugu ineriartortsivioreersunut atalissaaq. IKT-p atuartitsinermut ilanngunneqarnerunissaa pillugu periusissat ilikkagassanik pilersaarusiornermi qanimat suleqateqarluni pinissaat Naalakkersuisut pingartippaat.

Akissummi matumani allassimasutut attaveqaqtigiinnermi teknologiip nukittorsarneqartuarnissaa attaveqaatinillu pitsanngorsaanissaq Naalakkersuisut sulissutigiuarpaat.

Taamatut oqaaseqarlutik Naalakkersuisut siunnersuutip akuersaarneqarnissaa ataatsimiititiamullu ingerlatinnejarnissaa innersuussutigaat.